



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KT 0026631 25
Sarajevo, 12.11.2025. godine

SUD BOSNE I HERCEGOVINE
S A R A J E V O
Sudija za prethodno saslušanje

Na temelju člana 35. stav 2. tačka i) člana 226. stav 1. i člana 227. Zakona o kaznenom postupku Bosne i Hercegovine, podižem

OPTUŽNICU

Protiv:

Mugdim Omanović, zvani „Mugda“, rođen 1984. godine u Bugojnu, državljanin Bosne i Hercegovine.

Što je:

Dana 04.02.2025. godine oko 10.10 sati, u Mostaru, na raskrsnici ulica Stjepana Radića i Kralja Tomislava, gdje su se ovlaštena službena lica Državne agencije za istrage i zaštitu „(...)“, „(...)“, „(...)“, „(...)“ i „(...)“ nalazila radi obavljanja službene radnje lociranja i identifikacije osumnjičenog Mugdima Omanović, za kojim je bila raspisana operativna-centralna potraga Kazneno-popravnog zavoda u Busovači, broj: od 03.01.2024. godine, i kojom je bilo naloženo da se prilikom njegovog pronalaska odmah pristupi njegovom lišenju slobode, obzirom da se isti nije vratio u tu ustanovu nakon isteka odobrenog dopusta, policijski službenici „(...)“ i „(...)“, nakon što su uočili navedeno lice, izašli su iz službenog vozila, parkirano na navedenoj lokaciji u blizini stana, za koji su postojala saznanja da ga osumnjičeni koristi, i krenuli prema njemu u cilju njegove identifikacije, kojima su se pridružili, na toj lokaciji prisutni, policijski službenici „(...)“, „(...)“ i „(...)“, da bi nakon što je uočio navedene policijske službenike, osumnjičeni se dao u bjekstvo, a nakon glasnih upozorenja prisutnog policijskog službenika „(...)“ „policija, SIPA, stani“, koji je, pritom, istom pokazao svoju službenu legitimaciju, osumnjičeni je u namjeri da ih onemogućući u preduzimanju

službenih radnji iz njihove nadležnosti, izvadio iz džepa svoje jakne ručnu bombu, oznake ... sa upaljačem i kašikom sa oznakom ..., iz koje je izvadio osigurač, a koju ručnu bombu je neovlašteno držao, svjestan da nabavka tih eksplozivnih materija građanima uopće nije dozvoljena, htijući to, postupajući tako protivno odredbi člana 6. stav 2. tačka a) i člana 7. stav 1. tačka a) Zakona o oružju i municiji u Hercegovačko-neretvanskom kantonu (Službene novine Hercegovačko-neretvanskog kantona, broj: 5/2017 i broj: 5/2020), nastavljajući da se ubrzano kreće i udaljavajući se od njih, svjestan da upotrebom sile i prijetnjom da će neposredno upotrijebiti silu sprječava ovlaštena službena lica u vršenju njihove službene radnje njegovog lišenja slobode po navedenoj potrazi, htijući takvu posljedicu, te je tako, nakon što su ga navedeni policijski službenici sustigli na lokaciji u ulici Kralja Tomislava do broja 59 u Mostaru, vidjevši da osumnjičeni u ruci drži ručnu bombu, iz koje je prethodno izvukao osigurač, prijeteci da će je ispustiti, govoreći da se živ ne vraća u zatvor i da će lišiti života sebe i prisutne policijske službenike, nakon čega je u namjeri da ga savlada, policijski službenik „(...)“ uhvatio ga za ruku u predjelu šake u kojoj je držao bombu, dok je osumnjičeni pokušavao osloboditi tu ruku kako bi aktivirao bombu, pritom govoreći „ubit ću i sebe i vas jer ja se živ ne vraćam u zatvor“, da bi im prišli i ostali prisutni policijski službenici, koji su upotrebom fizičke sile oborili osumnjičenog na tlo, koji je i dalje pružao jak fizički otpor, nakon čega policijski službenik „(...)“ govori drugim svojim kolegama da se udalje jer mu ponestaje snage i nije u mogućnosti dalje držati ruku osumnjičenog i da očekuje da će bomba u njegovoj ruci eksplodirati, ili da mu pomognu, a nakon što je pustio njegovu ruku, osumnjičenom odmah prilazi policijski službenik „(...)“, koji je u međuvremenu izvadio službeni pištolj iz futrole, i hvata osumnjičenog za šaku u kojoj je bila bomba, a potom ga hvata za tu šaku i policijski službenik „(...)“, pri čemu obojica pokušavaju osloboditi stisak šake osumnjičenog kako bi od istog uzeli bombu, koji je pritom više puta govorio „pustite me da se ubijem“, te nakon što im osumnjičeni i dalje pruža otpor i nastavlja sa prijetnjama, policijski službenik „(...)“, svjestan da osumnjičenog, koji je nastavio sa pružanjem fizičkog otpora, ne može više da drži i da je upotreba sile u vidu upotrebe vatrenog oružja prijeko potrebna radi zaštite života prisutnih lica, postupajući sukladno članu 27. stav 1. i stav 2. Zakona o policijskim službenicima BiH („Službeni glasnik BiH“, broj: 27/2004), govori prisutnim policijskim službenicima „pucaj“, nakon čega policijski službenik „(...)“, uz glasno upozorenje dato osumnjičenom da će upotrijebiti vatreno oružje, vadi svoj službeni pištolj marke ..., iz kojeg ispaljuje jedan hitac u pravcu desnog stopala osumnjičenog, da bi, i nakon toga, osumnjičeni nastavio sa pružanjem fizičkog otpora prema njima, držeći i dalje u ruci ručnu bombu, a poslije ponovnog upozorenja prema osumnjičenom da će upotrijebiti vatreno oružje, „(...)“ je ispalio i drugi hitac u pravcu navedenog stopala osumnjičenog, nakon čega ovaj i dalje ne prestaje sa pružanjem fizičkog otpora, govoreći „pucaj u glavu, ubij me“, te nakon što je „(...)“ ispalio i treći hitac u njegovo desno stopalo, otpor osumnjičenog je oslabio, da bi, potom, policijski

službenik „(...)“ od osumnjičenog preuzeo navedenu bombu, oznake ..., sa upaljačem i kašikom, bez osigurača, uslijed čega je „(...)“ oko 30 (trideset) minuta bio primoran da ručnu bombu drži u svojoj desnoj ruci do dolaska policijskih službenika Ministarstva unutarnjih poslova Hercegovačko-neretvanskog kantona-KDZ Odjel, da se ista ne bi aktivirala; nakon čega je osumnjičeni, prilikom stavljanja lisica na njegove ruke od strane policijskog službenika „(...)“, pokušao da uzme službeni pištolj od istog, koji mu se nalazio za pojasom, u čemu nije uspio.

Dakle, osumnjičeni, upotrebom sile i prijetnjom da će neposredno upotrijebiti silu, spriječavao službena lica prilikom vršenja poslova sigurnosti u institucijama Bosne i Hercegovine pri njegovom lišenju slobode kao počinitelja kaznenog djela, te je neovlašteno držao eksplozivne materije, čija nabavka građanima uopće nije dozvoljena.

Čime je počinio kazneno djelo Spriječavanje službenog lica u vršenju službene radnje iz člana 241a. stav 3. u vezi sa stavom 1. KZ BiH u sticaju sa kaznenim djelom Nedoželjeno držanje oružja ili eksplozivnih materija iz člana 371. stav 1. Kaznenog zakona FBiH, a sve u vezi sa članom 53. KZ BiH.

TUŽITELJSTVO-TUŽILAŠTVO BiH
Tužitelj